

In cler confess ed appel a la trilinguitad

La Gruppa rumantscha e la Deputazione grigionitaliana dal Cussegl grond han surdà al minister da furmazion, cultura ed ambient Jon Domenic Parolini in manifest cuminaivel. Quel intenda da rinforzar la coesiun tranter las cuminanzas linguisticas en il Grischun triling.

MARTIN CABALZAR/FMR

Il Manifest GR3 è vegnì preschentà ier a la publicitad a l'ur da la sessiun dal Cussegl grond a Tavau en preschientscha da numerusas deputadas e deputads. Ils presidents da las duas gruppas parlamentaras numnadas *Lorenz Alig* e *Paolo Pappa* han silsuenter surdà il manifest a cusseglier guvernativ *Jon Domenic Parolini*.

Aziun cuminaivla cun 6 accents

Il Manifest GR3 cuntogna sis champs dal servetsch public, en ils quals las duas delegaziuns vesan la necessitad primordiala da megliar il resguard dal rumantsch e dal talian. Il manifest duai gidar a realisar l'egualitad dals dretgs da las trais linguas chantunales en il mintgadi. Ultra da quai duai il manifest promover il barat e la chapientscha tranter las trais cuminanzas linguisticas. Il Manifest GR3 è vegnì elavurà en collavuraziun cun las organizaziuns linguisticas Pro Grigioni Italiano e la Lia Rumantscha. El tracta ils sis champs: participaziun politica e represchentaziun, giustia, servetsch public, furmazion, infurmaziun ed identitad plurilingua. El è er accessibel publicamain sin www.gr3.ch.

Cun las sis pretensiuns vulan las duas gruppas parlamentaras sustegnair la via enchaminada da la regenza en ses program actual e marcan en tge secturs ch'ils parlamentararis rumantschs e talians speran da

survegnir ulteriurs signals. Uschia pretendan la gruppa ch'il post da coordinaziun «Administraziun plurilingua» survegnia fermas cumpetenzas ed haja in vast effect betg mo en l'administraziun chantunala, mabain er sin plaun regional e communal. Dal reminent è questa piazza vegnida scritta ora quests dis, sco quai che Jon Domenic Parolini ha pudì confermar.

La Gruppa rumantscha dal Cussegl grond, presidiada da Lorenz Alig, ha actualmain 27 commembras e commembres e s'engascha dapi l'onn 2001 per ils interess dal rumantsch. Ella è s'engaschada a moda activa tant tar la revisiun da la constituziun chantunala sco tar l'elavuraziun da la lescha da linguas. «Nus pre-

tendain da la regenza betg dapli e betg damain ch'il resguard consequent da questa lescha», ha accentuà Lorenz Alig. En curts testimonials han ils deputads *Urs Marti* (PLD), *Aita Zanetti* (AdC), *Tobias Rettich* (PS), *Agnes Brandenburger* (PPS) e *Manuel Athanes* (PS) exprimi lur relaziun persunala cun la trilinguitad grischuna, sustegnì il manifest e l'appel drizzà a la regenza. En num da quella ha cusseglier guvernativ Jon Domenic Parolini prendì encunter il manifest e sincerà che quel chattia portas avertas. En ses program guvernamental haja la regenza skizzà betg main che 80 mesiras da promozion che stoppian uss vegnir priorisadas e realisadas pass per pass.



Surdada dal manifest: da san. Paolo Pappa, regent Jon Domenic Parolini, il parsura dal parlament Martin Wieland, Lorenz Alig e Fabrizio Michael.

FOTO MARTIN CABALZAR